

焦氏易林

中江王潛

焦氏易林

中江王著

潮陽鄭
氏用黃
氏士禮
居本刊

欽定四庫全書提要

易林十六卷漢焦延壽撰延壽字贛梁人昭帝時由郡吏舉小黃令京房師之故漢書附見於房傳黃伯思東觀餘論以爲名贛字延壽與史不符又據後漢小黃門譙君碑稱贛之後裔疑贛爲譙姓然史傳無不作焦漢碑多假借通用如歐陽之作歐羊者不一而足亦未可執爲確證至舊本易林首有費直之語稱王莽時建信天水焦延壽其詞蓋出僞託鄭曉嘗辨之審矣贛嘗從孟喜問易然其學不出於孟喜漢書儒林傳記其始末甚詳蓋易於象數之中別爲占候一派者實自贛始所撰有易林十六卷又易林變占十六卷竝見隋志變占久佚惟易林尙存其書以一卦變六十四六十四卦之變共四千九十有六各繫以

詞皆四言韻語考漢藝文志所載易十三家著龜十五家
不及焦氏隋經籍志始著錄於五行家唐王俞始序而稱
之似乎後人所附會故鄭曉古言疑其明夷之咸林似言
成帝時事節之解林似言定陶傳太后事皆在延壽後顧
炎武日知錄亦摘其可疑者四五條然二家所云某林似
指某事者皆揣摩其詞炎武所指彭離濟東遷之上庸者
語雖出漢書而事在武帝元鼎元年不必漢書始載又左
傳雖西漢未立學官而張蒼等已久相述說延壽引用傳
語亦不足致疑惟長城旣立四夷賓服交和結好昭君是
福四句則事在元帝竟寧元年名字炳然顯爲延壽以後
語然李善註文選任昉竟陵王行狀引東觀漢記曰沛獻
王輔永平五年秋京師少雨上御雲臺詔尙席取卦具自

卦以周易卦林占之其繇曰蟻封穴戶大雨將集明日大雨上卽以詔書問輔曰道寧有是耶輔上言曰案易卦震之蹇蟻封穴戶大雨將集蹇艮下坎上艮爲山坎爲水出雲爲雨蟻穴居而知雨將雲雨蟻封穴故以蟻爲興文云云今書蹇繇實在震林則書出焦氏足爲明證昭君之類或方技家輾轉附益竄亂原文亦未可定耳崇文總目言其推用之法不傳而黃伯思記王秘占程迥記宣和紹興二占皆有奇驗則其術尙有知之者惟黃伯思謂漢書稱延壽易分六十四卦更直日用事者乃變占法非易林法薛季宣易林序則謂易林正用直日法辨伯思之說爲謬竝爲圖例以明之其說甚辨今錄季宣序與王俞序以存一家之言俞序本名大易通變與諸本不同疑爲後來卜

筮家所改非其舊也此書隋唐宋志俱作十六卷故季宣
序稱每卷四林每林六十四變今一本作四卷不知何時
所併無關宏旨今亦姑仍之焉

刻陸敕先校宋本焦氏易林序

世所行諸刻易林悉出自明內閣本成化癸巳彭華題後可證也分上下經爲卷或又析之作四卷而其譌舛不可卒讀則盡同近好事者多傳臨陸敕先校宋本文句碩異實視諸刻遠勝往歲陸手勘者歸予家續又收葉石君校本取以參驗先所傳臨竟有稍益失真處故付之刻凡陸勘而誤必存其真雖可知當爲某字者終不輒以改竄亦猶予向日刻他書之意耳其諸刻所附而陸勘未及者蓋皆非出於宋本概不載入陸僅就嘉靖四年所刻以勘而記於上方云卷次非宋本考季滄葦延令宋板書目焦氏易林十六卷八本未知其爲卽校宋本之祖抑板同而又有一部然分卷十六確鑿可信尙與隋志數合又嘗見一別本乃如此今特據之實每卷四卦也延令藏書散失流

轉予得之頗不少此書當仍在天壤閒安能一旦再出使所謂
全注並傳且行款偏旁均復舊觀必將爲陸勘助掃落葉豈不
更快識於此冀我二三同志搜訪之云

嘉慶十三年閏五月十日黃丕烈書

焦氏易林卷第一

乾之第一

乾 道陟石阪胡言連蹇譯瘖且聾莫使道通請謁不行求事
無功

坤 招殃來螫害我邦國病在手足不得安息

屯 陽孤亢極多所恨惑車傾蓋亡身常憂惶乃得其願雌雄
相從

蒙 鵠鵠鵠鵠專一無尤君子是則長受嘉福

需 日暉足動喜如其願舉家蒙寵

訟 罷馬上山絕無水泉喉焦唇乾舌不能言

師 倉盈庾億宜稼黍稷國家富有人民蕃息

與比之升
坤之恆同

比 中夜狗吠盜在墻外神明祐助銷散皆去

小畜据斗運樞順天無憂與樂並居

履 空拳握手倒地更起富饒豐衍快樂無已

泰 不風不雨白日皎皎宜出驅馳通理大道

與坤同

否 載日晶光驂駕六龍祿命徹天封爲燕王

同人子號索哺母行求食反見空巢訾我長息

大有上帝之生福祐日成修德行惠樂安且寧

謙 山險難登澗中多石車馳轄擊載重傷軸僭負善蹟趺踈

右足

豫 禹鑿龍門通利水源東注滄海民得安存

隨 乘龍上天兩蛇爲輔湧躍雲中遊觀滄海安樂長處

蠱 彭祖九子據德不殆南山松柏長受嘉福

臨 南山昊天刺政關身疾悲無辜背憎爲仇

觀 江河淮海天之奧府眾利所聚可以饒有樂我君子百福
是受

噬嗑堅冰黃鳥啼哀悲愁不見甘粒但觀藜蒿數驚鷺鳥爲我
心憂

賁 室如懸磬旣危且殆早見之士依山谷處
剝 大禹式路蚩尤除道周匝萬里不危不殆見其所使無所
不在

復 三人爲旅俱歸北海入門上堂拜謁王母勞賜我酒

無妄傳言相誤非干徑路鳴鼓逐狐不知迹處
大畜三羊爭雌相逐奔馳終日不食精氣勞疲
頤 純服黃裳戴上與興德義旣生天下歸仁

大過桀跖並處人民愁苦擁兵荷糧戰於齊魯

坎 黃鳥采芣既嫁不答念我父兄思復邦國
離 胎生孚乳長息成就充滿帝室家國昌富
咸 三人求橘反得丹穴女貴以富黃金百鎰
恆 東山西岳會合俱食百家送從以成恩福
遯 弱雞無距與鵠交鬪翹折目盲爲鳩所傷
大壯 隙大墻壞蠹眾木折狼虎爲政天降罪罰高弑望夷胡亥
以斃

晉 三癡俱走迷路失道惑不知歸反入患口
明夷 弓矢俱張把彈折絃丸發不至道遇害患
家人 三女求夫伺候山隅不見復關長思歎憂
睽 陽旱炎炎傷害禾穀穡人無食耕夫歎息
蹇 騎狔逐羊不見所望徑涉虎穴亡羊失羔

解 暗昧冥語相傳註誤鬼魅所舍誰知臥處

損 姬姜祥淑二人偶食論仁議福以安王室

益 公孫駕驪載聊東齊延陵說產遺季紵衣

夬 孤竹之墟失婦亡夫傷於疾藜不見少妻東郭棠姜武氏

以亡

姤 仁政不暴鳳凰來舍四時順節民安其處

萃 任劣力薄孱駑恐怯如蜩見鵲不敢拒格

升 衛侯東遊惑於少姬亡我考妣久迷不來

困 噂噂所言莫如我垣歡喜堅固可以長安

大有之屯

井 鸞鳴岐山龜應幽淵男女媾精萬物化生文王以成爲周

開庭

革 玄黃虺隤行者勞疲役夫憔悴踰時不歸

鼎 弱足則跟不利出門市賈不利折亡爲患

震 懸貍素餐居非其安失輿剝廬休坐徒居

艮 民怯城惡姦人所伏寇賊大至入我郭郭妻子俘獲一本爲歸

姊辭

漸 陽低頭陰仰首水爲災傷我足進不利難生子

歸 妹背北相憎心意不同如火與金一本爲艮辭

豐 太微帝室黃帝所宜藩屏周衛不可得入常安無患

旅 繭栗犧牲敬享鬼神嗜飲食受福多孫

巽 出門逢惡與禍爲怨更相擊刺傷我手端

兌 鷁飛中退舉事不進眾人亂潰

渙 跛踦相隨日暮牛罷陵遲後旅失利亡雌泰之復

節 龍角博預位至公卿世祿久長起動安寧

中孚舜升大禹石夷之野徵請王庭并治水土師之小畜同

小過從風放火荻芝俱死三害集房叔子中傷

既濟梗生荆山命制輸班袍衣剝脫夏熱冬寒飢餓枯槁莫人
莫憐

未濟長面大鼻來解已憂遣吾福子與我惠妻惠吾嘉喜

坤之第二

坤 不風不雨白日皎皎宜出驅馳通利大道

乾 谷風布氣萬物出生萌庶長養華葉茂成

屯 蒼龍單獨與石相觸摧折兩角室家不足

蒙 城上有烏自名破家招呼酖毒爲國患災

需 霜降閉戶蟄虫隱處不見日月與死爲伍小畜之解

訟 天之德室溫仁受福衣裳所在凶惡不起

師 皇陛九重絕不可登未見王公謂天蓋高
比 孔德如玉出於幽谷升高鼓翼輝光照國
小畜五輓四軌復得饒有陳力就列騶虞悅喜
履 四足無角君子所服南征述職以惠我國
泰 雷行相逐無有攸息戰于平陸爲夷所覆
否 六龍爭極服在下飾謹慎管鑰結禁毋出
同人長男少女相向共語福祿歡喜

大有奸延惡人使德不通炎火爲殃禾穀大傷

謙 修其翰翼隨風向北至虞夏國與舜相得年歲大樂邑無

盜賊

豫 鈎刀攻玉堅不可得盡我筋力眠噩爲疾

比之大過

隨 舉被覆目不見日月衣裳簠簋就長夜室

泰之臨同